

史
通
訓
故
補

史通訓故補卷之十二

北平黃叔琳崑圃補注

海虞顧鎮備九叅訂

吳門盛錦庭堅同訂

古今正史第二

總十八條

三墳五典

易曰上古結繩以理後世聖人易之以書契儒者云伏犧氏始畫八卦造書契以代結繩之政由是文籍生焉又曰伏犧神農黃帝之書謂之三墳言

大道也少昊顓頊高辛唐虞之書謂之五典言常
道也春秋傳載楚左史能讀三墳五典禮記曰外
史掌三皇五帝之書由斯而言則墳典文義三五
典策至於春秋之時猶大行於世爰及後世其書
不傳惟唐虞已降可得言者然自堯而往聖賢猶
述求其一二髣髴存焉而後來諸子廣造奇說其
語不經其書非聖故馬遷有言神農已前吾不知
矣班固亦曰顓頊之事未可明也斯則墳典所記
無得而稱者焉

尚書

堯舜相承已見墳典周監二代各有書籍至孔子
討論其義刪為尚書始自唐堯下終秦繆其言百
篇而各為之序屬秦為不道坑儒禁學孔子之末
孫曰孔惠壁藏其書漢室龍興旁求儒雅聞故秦
博士伏勝能傳其業詔太常使掌故臯錯受焉時
伏生年且百歲言不可曉口授其書纔二十九篇
自是傳其學者有歐陽氏大小夏侯宣帝時復有
河內女子得秦誓一篇獻之與伏生所誦合三十

篇行之於世其篇所載年月不與序相符合又與

左傳國語孟子所引泰誓不同故漢魏諸儒

謂馬融鄭

玄王肅也咸疑其繆古文尚書者即孔惠之所藏科斗

之文字也魯恭壞孔子舊宅始得之於壁中博士

孔安國以校伏生所誦增多二十五篇更以隸古

字寫之編為四十六卷司馬屢採其事故遷多有

古說安國又受詔為之訓傳值武帝末巫蠱事起

經籍道息不獲奏上藏諸私家劉向取校歐陽大

小夏侯三家經文脫誤甚衆至於後漢孔氏之本

遂絕其有見於經典者諸儒皆謂之逸書

馬融鄭玄杜預

也

王肅亦注今文尚書而大與古文孔傳相類或

肅私見其本而獨秘之乎晉元帝時豫章內史梅賾始以孔傳奏上而缺舜典一篇乃取肅之堯典從慎徽以下分為舜典以續之自是歐陽大小夏侯家等學馬融鄭玄王肅諸注廢而古文孔傳獨行列於學官永為世範齊建武中吳興人姚方興采馬王之義以造孔傳舜典云於大航購得詣闕以獻舉朝集議咸以為非

梁武帝時為博士議曰孔叔稱伏生誤合五篇

劉炫仕隋
不達終于太
學博士未嘗
爲學士

蓋文句相連所以或合。舜典必有粵若稽。及江陵
版蕩其文入北中原學者得而異之。隋學士劉炫
遂取此一篇列諸本第。故今人所習尚書舜典元
出於姚者焉。

前漢書歐陽生字和伯。千乘人。父尚書于伏生。
以授兒寬。由是尚書世有歐陽氏學。

前漢書夏侯勝其先夏侯都尉。從濟南張生受
尚書。以傳族子始昌。始昌傳勝。勝傳從兄子建。
由是尚書有大小夏侯之學。

前漢書魯恭王餘。孝景程姬之子也。初立爲淮
陽王。後徙王魯。恭王好治宮室。壞孔氏舊宅以
廣其宮。於其壁中得古文經傳。
南齊書建武齊明帝蕭鸞改元。

補注

隋書經籍志漢武帝時魯恭王壞孔氏舊宅得其未孫惠所藏之書字皆古文孔安國以今文校之得二十五篇其泰誓與河內女子所獻不同又伏生所誦有五篇相合並依古文間其篇第以隸古字寫之合成五十八篇為之作傳會巫蠱事起不得奏上至東晉豫章內史梅賾始得安國之傳奏之時又闕舜典一篇齊建武中吳姚方興於大桁市得其書奏上比馬鄭所注多二十八字

春秋

當周室微弱諸侯力爭孔子應聘不遇自衛而歸乃與魯君子左丘明觀書於太史氏因魯史記而作春秋上遵周公遺制下明將來之法自隱及哀

十二公行事經成以授弟子弟子退而異言正明
恐失其真故論本事而為傳明夫子不以空言說
經也春秋所貶當世君臣其事實皆形於傳故隱
其書而不宣所以免時難也及末世口說流行故
有公羊穀梁鄒夾之傳鄒氏無師夾氏有錄無書
故不顯於世漢興董仲舒公孫弘並治公羊其傳
習者有嚴顏二家之學宣帝即位聞衛太子私好
穀梁乃召名儒蔡千秋蕭望之等大議殿中因置
博士平帝初立左氏逮於後漢儒者數廷毀之會

博士李封卒遂不復補和帝元興十一年鄭興父子奏請重立於學官至魏晉其書漸行而二傳亦廢今所用左氏本即杜預所注者

前漢書顏注公羊子名高齊人穀梁子名喜魯人俱著春秋傳

史記公孫弘字季菑川國薛人武帝時為丞相封平津侯

前漢書嚴彭祖字公子下邳人頗安樂字公孫薛人俱事莊孟孟弟子百餘人惟彭祖安樂質問疑義各持所見孟曰春秋之義在二子矣
前漢書衛子夫得幸生戾太子據武帝詔太子受公羊春秋太子既通復私問穀梁而善之宣帝史皇孫之子戾太子之孫也既立聞衛太子好穀梁乃詔諸儒議之由是穀梁之學大盛
前漢書沛蔡千秋從魯榮廣受穀梁春秋為學

最篤。宣帝召見。使說經。善之。擢為諫大夫。
前漢書。蕭望之。字長倩。南陵人。宣帝時。詔望之
等。平公羊穀梁同異。望之等十一人。各以經詁
對。多從穀梁。由是穀梁之學盛。

後漢書。范升。以左氏戔末。不宜立學。陳元爭之。
與升辨。凡十餘上。帝卒立左氏學。太常選博士
四人。元為第一。帝以元新忿爭。乃用其次司隸
從事李封。諸儒以左氏立。議論譁譁。公卿以下。
數廷爭之。會李封卒。左氏復廢。
後漢書。鄭興。字少贛。開封人。善左氏傳。光武徵
為太中大夫。子泉。字仲師。從父受左氏春秋。以
明經。遷給事中。

補注

隋書經籍志。漢初有公羊穀梁鄭氏夾氏四家
並行。王莽之亂。鄭氏無書。夾氏以漢書注云。夾
氏有錄。無書。又左氏出于張蒼之家。本無傳者。
至文帝時。賈誼為訓詁。授趙人賈公。其後劉歆
典校經籍。考而正之。欲立于學。諸儒莫應。至建

武中尚書令韓詵請立而未行陳元最明左傳
上書訟之乃以魏郡李封為左氏博士羣儒蔽
國者數廷爭之及封卒遂罷晉時杜預又為經
傳集解至隋盛行

史記

又當春秋之世諸侯國自有史故孔子求衆家史
記而得百二十國書如楚之書鄭之志魯之春秋
魏之紀年此其可得言者左丘明既配經立傳又
撰諸異同號曰外傳國語二十一篇斯蓋採書志
等文非唯魯之史記而已楚漢之際有好事者錄
自古帝王公侯卿大夫之世終乎秦末號曰世本

十五篇春秋之後七雄並爭秦并諸侯則有戰國

策三十三篇漢興太中大夫陸賈紀錄時功

一作政

作楚漢春秋九篇孝武之世太史公司馬談欲錯

綜古今勒成一史其意未就而卒子遷乃述父遺

志採左傳國語刪世本戰國策據楚漢列時事上

自黃帝下訖麟趾作十二本紀十表八書三十世

家七十列傳凡百三十篇都謂之史記協厥六經

異傳整齊百家雜言藏諸名山副在京師以俟後

聖君子至宣帝時遷外孫楊惲祖述其書遂宣布

焉而十篇未成有錄而已張晏漢書注云十篇歿
後亡失此說非也元成之間會稽褚先生更補其
缺作武帝紀三王世家龜策日者等傳其龜策日
者辭多鄙陋非遷本意也晉散騎常侍巴西譙周
以遷書周秦以上或採家人諸子不專據正經於
是作古史考二十五篇皆憑舊典以紕其繆今則
與史記並行於代焉

前漢書楊惲華陰人母司馬遷女也惲始讀太
史公記頗為春秋以才能稱

蜀志譙周字允南西充人後主時徙中散大夫
蜀平入魏封陽城亭侯

補注

晉書司馬彪傳初譙周以司馬遷史記書周秦以上或採俗語百家之言不據正經於是作古史考二十五篇皆憑舊典以糾遷之謬誤彪復以周書未盡善也條古史考中凡百二十二事為不當

前漢書

史記所書年止漢武太初已後闕而不錄其後劉向向子歆及諸好事者若馮商衛衡揚雄史岑梁審肆仁晉馮段肅金丹馮衍韋融蕭奮劉恂等相次撰續迄于哀平間猶名史記至建武中司徒掾班彪以為其言鄙俗不足以踵前史又雄歆偽褒

新莽誤後惑衆不當垂之後代者也於是採其舊
事旁貫異聞作後傳六十五篇其子固以父所撰
未盡一家乃起元高皇終乎王莽十有二世二百
三十年綜其行事上下通洽為漢書紀表志傳百
篇其事未畢會有上書云固私改作史記者有詔
京兆收繫悉錄家書封上固弟超詣闕自陳明帝
引見言固續父所作不敢改易舊書帝意乃解即
出固徵詣校書受詔卒業經二十餘載至章帝建
初中乃成固後坐竇氏事卒於洛陽獄書頗散亂

莫能綜理其妹曹大家博學能屬文奉詔校叙又
選高才郎馬融等十人從大家授讀其八表及天
文志等猶未克成多是待詔東觀馬續所作而古
今人表不類本書始自漢末迄乎陳世為其注解
者凡二十五家至於專門受業與五經相亞初漢
獻帝以固書文煩難省乃詔侍中荀悅依左氏傳
刪為漢紀三十篇命秘書給紙筆經五年乃就其
言簡要亦與本傳並行

後漢書馮衍字敬通杜陵人田邑既降帝怒衍
等不時至遂見黜

前漢書班固為實憲中護軍及憲敗固先坐免官初洛陽令种兢嘗出行固奴干其車騎吏推呼之奴醉罵兢畏憲不敢發而心銜之及實氏賓客皆逮考兢因此捕固係死獄中

後漢書曹大家名昭字惠姬曹世叔之妻班彪之女也兄固著漢書未竟而卒和帝詔昭就東觀藏書閣踵而成之

後漢書馬嚴七子惟融續知名續字季則博觀羣書順帝時漢書始出多未能通者馬融從班昭受讀後詔融兄續繼昭成之

補注

隋書經籍志漢書集解音義二十四卷太山太守應劭撰漢書音訓一卷服虔撰漢書音義七卷韋昭撰漢書音二卷梁潯陽太守劉顯撰漢書音二卷夏侯詒撰漢書音義十二卷國子博士蕭詒撰漢書音十二卷廢太子勇命包愷等撰漢書集注十三卷晉灼撰漢書注一卷齊光祿大夫陸澄撰漢書續訓三卷梁韋稜撰漢書

訓纂三十卷、陳吏部尚書姚察撰、漢書集解一卷、姚察撰、漢書叙傳五卷、項岱撰、論前漢事一卷、諸葛亮撰、漢書取義二卷、晉安北將軍劉寶撰、定漢書疑二卷、姚察撰、漢疏四卷、凡十四家、無考者一家、

唐書藝文志、孟康漢書音義九卷、崔浩漢書音義二卷、孔文祥漢書音義鈔二卷、劉嗣等漢書音義二十六卷、陰景倫漢書律歷志音義一卷、顏游秦漢書決疑十卷、僧務靜漢書正義三十卷、李喜漢書辨惑三十卷、漢書正名氏義十二卷、漢書英華八卷、凡八家、無考者二家、

後漢書

在漢中興、明帝始詔班固、與睢陽令陳宗、長陵令尹敏、司隸從事孟冀、作世祖本紀、并撰功臣及新

市平林公孫述事作列傳載記二十八篇自是以
來春秋世口亦以煥炳而忠臣義士莫之撰勒於
是又詔史官謁者僕射劉珍及諫議大夫李尤雜
作紀表名臣節士儒林外戚諸傳起自建武訖乎
永初事業垂竟而珍等繼卒復命侍中伏無忌與
諫議大夫黃景作諸王王子功臣恩澤侯表南單
于西羌傳地理志至元嘉元年復令大中大夫邊
韶大軍營司馬崔寔議郎朱穆曹壽雜作孝穆崇
二皇及順烈皇后傳又增外戚傳入安思等后儒

林列傳入崔篆諸人寔壽又與議卽延篤雜作百官表順帝功臣孫程郭願及鄭眾蔡倫等傳凡百十有四篇號曰漢記熹平中光祿大夫馬日磾議卽蔡邕楊彪盧植著作東觀接續紀傳之可成者而邕別作朝會車服二志後坐事徙朔方上書求還續成十志會董卓作亂大駕西遷史臣廢棄舊文散逸及在許都楊彪頗存注記至於名賢君子自太初已下闕續魏黃初中唯著先賢表故記殘缺至晉不成太始中秘書丞司馬彪始討論衆說

綴其所聞起元光武終於孝獻錄世十二編年二百通綜上下旁引庶事為紀志傳凡一十三篇號曰續漢書又散騎常侍華嶠刪定東觀記為漢後書帝紀十二皇后紀二三譜十典列傳七十摠九十七篇其十典竟不成而卒自斯已後作者相繼為編年者四族創紀傳者五家推其所長華氏居最而遭晉室東徙三惟一存至宋宣城太守范曄乃廣集學徒窮覽舊籍刪煩補畧作後漢書凡十紀十志八十列傳合為百篇會曄以罪被收其十

志亦未成而死。先是晉東陽太守袁宏抄撮漢氏後書依荀悅體著後漢紀十三篇。世言漢中興史者唯范曄二家而已。

後漢書李尤字伯仁廣漢人安帝時為諫議大夫受詔與僕射劉珍等俱撰漢記。

後漢書建武先武改元永初安帝改元。

後漢書伏湛先武時徙封不其侯傳爵至玄孫無忌無忌博物多識桓帝時詔與黃景崔寔等共撰漢記。

後漢書元嘉桓帝改元。

後漢書邊韶字孝先後漢人桓帝時徵拜太中

大夫著作東觀。

後漢書崔寔字子真涿郡安平人桓帝時為郎後漢書順烈梁皇后妹大將軍尚之女永建三年選入宮為貴人陽嘉元年立為后冲帝立。

尊為皇太后。

後漢書：安思問皇后諱姬，滎陽人。問暢之女。元初元年，選入宮。二年，立為后。後以濟陰王事，遷之祿宮。

後漢書：崔篆，王莽時為郡文學。徵詣公車，被詔歸。莽復以為建新大尹，未幾稱疾去。

後漢書：孫程，字稚卿，涿郡新城人。安帝時為中黃門，以立濟陰王，是為順帝，封浮陽侯。

後漢書：鄭眾，字季產，南陽犂人。肅宗即位，拜小黃門，以誅竇憲，遷大長秋。後封鄴鄉侯。

後漢書：蔡倫，字敬仲，桂陽人。永平末，給事宮掖。後封龍亭侯。

後漢書：熹平，靈帝改元。

三輔決錄：馬日磾，字翁叔，融之族孫。獻帝時官太傅，與蔡邕、楊賜等校定石經。

魏志：黃初，文帝改元。

晉書：太始，武帝改元。

補注

後漢書延篤傳篤字叔堅南陽犇人桓帝徵拜
議郎與朱穆連龍共著作東觀仕至京兆尹
後漢書盧植傳植與馬日磧蔡邕楊彪等並在
東觀校書補續漢記

三國志

魏史黃初太和中始命尚書衛覲繆襲草創紀傳
累載不成又命侍中韋誕應璩秘書王沉大將軍
從事中郎阮籍司徒右長史孫資司隸校尉傅玄
等復共擇定其後王沉獨就其業勒成魏書四十
四卷其書多為時諱殊非實錄吳大帝之季年始
命太史令丁孚郎中項峻撰吳書峻孚俱非史才

其文不足紀錄至少帝時更勅韋曜周昭薛瑩梁
廣華覈訪求往事相與記述並作之中推瑩為首
當歸命侯時廣昭先亡曜瑩徙黜史官久闕書遂
無聞覈表請曜瑩續成前史其後曜獨終其書定
為五十五卷至晉受命海內大同著作陳壽乃集
三國史撰為國志凡六十五篇夏侯湛時亦著魏
書見壽所作便壞已草而罷及壽卒梁州大中正
范頽表言國志明乎得失辭多勸誡有益風化願
垂採錄於是詔下河南尹就家寫其書先是魏時

京兆魚豢私撰魏畧事止明帝其後孫盛撰魏氏春秋王隱撰蜀記張勃撰吳錄異聞錯出其流最多宋文帝以國志載事傷於簡畧乃命中書郎裴松之兼採衆書補注其闕由是世言三國志者以裴注為本焉

魏志衛覲字伯儒河東安邑人。以才學稱。魏國建拜侍中。

文章叙錄。孫資字公遠。仕城人。年二十。上計掾。召為郎中。著魏書。

吳志孫權諡大皇帝。

吳志華嚴字永先。武進人。以文學入為秘書郎。孫皓時。遷東觀令。領右國史。

補注

文章志。繆襲。字熙伯。蘭陵人。事魏四世。多所造。叙官至尚書光祿勳。

文章叙錄。韋誕。字仲將。京兆人。太和中為武都太守。以能書留補侍中。

文章叙錄。龐參。字休遠。汝南人。官至侍中。晉書傳立傳。立與東海繆施俱以時譽選入著作。

吳志。薛綜傳。綜子瑩。孫皓初為執法。遷尚書領

少傅。坐何定事。徙廣州。右國史華覈上疏曰。大皇帝末年。命太史令丁孚。即中項峻。始撰吳書。孚峻俱非史才。其所撰作。不足紀錄。至少帝時。更差韋曜。周昭。薛瑩。梁廣及臣五人。共撰立。備有本末。昭廣先亡。昭負恩貽罪。瑩出為將。復以過徙。其書遂委滯。迄今未撰奏。且愚淺才劣。適足為瑩記注而已。瑩涉學既博。文章尤妙。同僚之中。瑩為冠首。是以悽悽為國惜之。奏上。皓遂名瑩還為左國史。與華覈共撰吳書。遷光祿勳。入晉為散騎常侍。著書八篇。名曰新議。

晉書陳壽傳壽仕蜀為觀閣令史屢被譴黜遭父喪有疾使婢九藥卿黨以為貶議及蜀平生是沉滯者累年司空張華愛其才學舉為孝廉除佐著作郎撰魏吳蜀三國志夏侯湛時著魏書見壽所作使壞己書後壽官至治書侍御史及卒梁州大中正尚書郎范頴等上表言三國志辭多勸誡明乎得失有益風化雖文體不及相如而質直過之願垂採錄於是詔下河南尹洛陽令就家寫其書

晉書夏侯湛傳湛字孝若幼有盛才而美容觀與潘岳善每行止同輿接茵京都謂之連璧官至散騎常侍唐書藝文志王隱刪補蜀記七卷張勃吳錄三十卷

晉書

晉史洛京時著作郎陸機始撰三祖記佐著作郎

東哲又撰十志會中朝喪亂其書不存先是歷陽令陳郡王銓有著述才每私錄晉書及功臣行狀未就而卒子隱博學多聞受父遺業西都事跡多所詳究過江為著作即受詔撰晉史為其同僚虞預所斥坐事免官家貧無資書未遂就乃依征西將軍庾亮於武昌鎮亮給其紙墨由是獲成凡為晉書八十九卷咸康六年始詣闕奏上隱雖好述作而辭拙才鈍其書編次有序者皆銓所修章句混漫者必隱所作時尚書郎領國史干寶亦撰晉

紀自宣訖愍七帝五十三年凡二十二卷其書簡
畧直而能婉甚為當時所稱晉江左史自鄧粲孫
盛主韶之檀道鸞已下相次繼作遠則編紀兩帝
近則唯叙六朝至宋湘東太守何法盛始撰晉中
興書勒成一家首尾該備齊隱士東莞臧榮緒又
集東西二史合成一書皇家貞觀中有詔以前後
史十有八家制作雖多未能盡善乃勅史官更加
纂錄採正典與舊一作雜說數十餘部兼引偽史十
六國書為記十志二十列傳七十載記三十并序

例目錄合為百三十二卷自是言晉史者皆棄其
舊本競從新撰者焉

晉書成康成帝改元

〔補注〕

晉書陸機傳機字士衡吳郡吳人太康末與弟
雲俱入洛為吳王吳毆中郎趙王倫輔政引為
相國參軍豫誅賈謏功賜爵關中侯倫誅坐徒
邊遇赦而止後成都王穎與河間王顒起兵討
長沙王乂假機後將軍河北大都督督王粹牽
秀等軍二十餘萬與乂戰大敗官人孟玖及弟
超誣機有異志牽秀等誑之遂遇害隋書經籍
志晉紀四卷陸機撰

晉書東晉傳晉字廣微陽平元城人漢太子太
傅疎廣之後也王莽末廣曾孫孟達避難徙居
沙鹿山南因去疎之足遂改姓焉晉為佐著作
郎撰晉書帝紀十志趙王請為記室辭疾罷歸

晉書王隱傳隱父銓歷陽令私錄晉事及功臣行狀未就而卒隱受父遺業而部舊事多所詰寃太興初召為著作郎令撰晉史時虞預竊寫隱書後更疾隱隱以誇免家貧無資書遂不就乃依庾亮于武昌供隱紙筆書乃成詣閣上之隱雖好著述而文辭鄙拙蕪舛不倫其書次第可觀者皆其父所撰文體澗漫義不可解者隱之作也

隋書經籍志晉書八十六卷晉蕭作即王隱撰晉書二十六卷晉散騎常侍虞預撰晉書十卷晉中書郎朱鳳撰晉中興書七十八卷宋湘東太守何法盛撰晉書三十六卷宋臨川內史謝靈運撰晉書一百一十一卷齊徐州主簿臧榮緒撰晉書十一卷梁蕭子雲撰晉史草三十卷梁蕭子顯撰晉紀四卷陸機撰晉紀二十三卷干寶撰晉紀十卷曹嘉之撰晉紀十一卷鄧粲撰晉陽秋三十二卷孫盛撰晉紀二十三卷劉惔之撰晉紀十卷王韶之撰晉紀四十五卷徐廣

撰續晉陽秋二十卷宋永嘉太守檀道鸞撰續
晉紀五卷宋新興太守郭季產撰

宋書

宋史元嘉中著作郎何承天草創紀傳自此以外
悉委奉朝請山謙之補承天殘缺後又命裴松之
續成國史松之尋卒史佐孫冲之表求別自創立
為一家之言孝建初又勅南臺侍御史蘇寶生續
造諸傳元嘉名臣皆其所撰寶生被誅大明六年
又命著作郎徐爰踵成前作爰因何孫山蘇所述
勒成一書其臧質魯爽王僧達諸傳又皆孝武自

造而序事多虛難以取信自永光已後至禪讓十
餘年中闕而不載至齊著作郎沈約更補綴所遺
製成雜史自義熙肇號終乎昇明三年為記十志
三十列傳六十合百卷名曰宋書永明末其書既
行河東裴子野更刪為宋畧二十卷沈約見而歎
曰吾所不逮也由是世之言宋史者以裴畧為上
沈書次之

宋書何承天東海郡人仕宋領著作佐郎撰國
史

南史錄實者名實生本寒門有文義之美元嘉
中立國子學為毛詩助教

南史·臧質字含文·東莞莒人·世祖即位·以質為都督江州諸軍事·後同義宣謀反·伏誅·

宋書·魯爽·小名女生·扶風郿人·世祖以為都督豫州諸軍事·後與義宣謀逆·為薛安都所誅·

宋書·王僧達·瑯邪人·為始興王叅軍·累遷中書令·

宋書·元嘉·文帝改元·孝建·大明·俱·孝武帝改元·永光·廢帝改元·

晉書·義熙·晉安帝改元·宋書·昇明·順帝改元·南齊書·永明·齊武帝改元·

補注

南史·裴松之傳·松之續何承天國史·未及撰述卒·曾孫子野·撰宋書二十卷·其叙事評論·多善沈約歎其述作曰·吾弗逮也·

齊書

齊史·江淹始受詔著述·以史之所難·無出於志·故

史通訓故補

卷十二

六

先著其志以見其才沈約復著齊紀二十篇紀八
志十一列傳四十合成五十九篇時奉朝請吳均
亦表請撰齊史乞給起居注并羣臣行狀有詔齊
氏故事布在流俗聞見既多可自投訪也均遂撰
齊春秋三十篇其書稱梁帝為齊明佐命帝惡其
實詬一作詔燔之然其私本竟能與蕭氏所撰並傳
於後

南史梁武帝諱衍姓蕭氏蘭陵中都里人齊鬱
林失德明帝作輔將為廢立計帝欲助齊明傾
齊武之嗣明帝知之每與帝謀明帝時封建陽
縣男後受齊祚

補注

南史檀超傳超上表立條例開元紀疏不取宋
年封爵各詳本傳無假年表又若十志史功未
成徙交州江淹撰成之猶不備也

南史沈約傳約字休文吳興武康人梁左僕射
封建昌侯撰晉書一百餘卷齊建元四年被勅
撰國史永明五年又被勅撰宋書六年畢功其
所撰國史為齊紀二十卷

梁書吳均傳均字叔庠吳興故鄣人除奉朝請
先是均表求撰齊春秋書成奏之高祖以其書
不寔使劉之遴詰問數條竟支離無對勅付省
焚之

梁書

梁史武帝時沈約與給事中周興嗣步兵校尉鮑
行卿秘書監謝昊相承撰錄已有百篇值承聖淪

漢並從焚蕩廬江何之元沛國劉璠以所聞見究其始末合撰梁典三十篇而紀傳之書未有其作陳祠部郎中姚察有志撰勒施功未周但既當朝務兼修國史至於陳亡其書不就

梁書周興嗣字思纂項郡人歷官員外郎南史鮑行卿以博學稱爲臨川王錄事累遷中書舍人

梁書承聖元帝改元

一補注

南史何之元廬江蕩人仕陳中衛府監議參軍著梁典起齊永元元年代于王琳遇獲七十五年行事爲三十卷北史劉璠字資義沛人爲梁宜豐侯蕭修主簿入周爲內史中大夫著梁典三十卷

南史姚察字伯審。吳興武康人。梁元帝即位。授佐著作。撰史。仕陳為尚書祠部侍郎。後歷淮南王建安王二府諮議參軍。丁內憂。去職。俄起為戎昭將軍。知撰梁史。入隋授秘書丞。別勅成梁陳二史。未畢功。戒子思康撰續。

陳書

陳史初有吳郡顧野王北地傳緯各為撰史學士其武文二帝紀即顧傳所脩太建初中書郎陸瓊續撰諸篇事傷煩雜姚察就加刪改粗有條貫及江東不守持以入關隋文帝常索梁陳事跡察具以所成每篇續奏而依違荏苒竟未絕筆皇家貞

觀初其子思廉為著作郎奉詔撰成二史於是憑其舊藁加以新錄彌歷九載方始畢功述為梁書五十六卷陳書三十六卷今並行世焉

陳書顧野王字希馮吳人梁大通初除太學博士入陳歷撰史學士

陳書傅縡字宜事靈州人梁太清末南奔為王琳記室琳亡陳文帝召為撰史學士

南史陳高祖武帝諱霸先於陳氏吳興長城下若里人受梁敬帝禪世祖文帝諱蒨字子

華始興王之長子也武王崩詔入繼大業太建宣帝改元

北史隋高祖文帝姓楊氏諱堅弘農華陰人漢太尉震之十四世孫也受周靜帝禪

陳書陸瓊字伯玉吳郡人仕陳歷官吏部尚書唐書姚思廉本名簡以字行仕隋為漢王府參

單入唐為弘文館學士

十六國春秋

十六國史前趙劉聰時領左國史公師或撰高祖本紀及功臣傳二十八甚得良史之體凌脩譖其訕謗先帝聰怒而誅之劉曜時平與子和苞撰趙記十篇事止當年不終曜滅後趙石勒命其臣徐光宗歷傳暢郭愔等撰上黨國記起居注趙書其後又令王蘭陳宴程陰徐機等相次撰述至石虎並令刊削使勒功業不傳其後燕太傅長史田融

宋尚書庫部郎郭仲產北中郎叅軍王度追撰石
事集鄴都記趙記等書前燕有起居注杜輔全錄
以為燕紀後燕建興元年董統受詔草創後書著
本紀并佐命功臣王公列傳合三十卷慕容垂稱
其叙事富贍足成一家之言但褒述過美有慙董
史之直其後申秀范亨各取前後二燕合成一史
南燕有趙郡王景暉嘗事德超撰二主起居注
亡仕於馮氏官至中書令仍撰南燕錄六卷蜀初
號曰成後改稱漢李勢散騎常侍常璩撰漢書十

卷後入晉秘閣改為蜀李書璩又撰華陽國志具
記李氏興滅前涼張駿十五年命其西曹邊瀏集
内外事以付秀才索綏作涼國春秋五十卷又張
重華護軍叅軍劉慶在東苑專修國史二十餘年
著涼記十二卷建康太守索暉從事中郎劉昞又
各著涼書前秦史官初有趙淵車敬梁熙韋譚相
繼著述符堅嘗取而觀之見苟太后幸李威事怒
而焚滅其本後著作郎董誼追錄舊語十不一存
及宋武帝入關曾訪秦國事又命梁州刺史吉翰

問諸仇池並無所獲先是秦秘書郎趙整奏撰國
史值秦滅隱于商洛山著書不輟有馮翊車頻助
其經費整卒翰乃啟頻纂成其書以元嘉九年
起至二十八年方罷定為三卷而年月失次首尾不
倫河東裴景仁又正其訛僻刪為秦記十一篇後
秦扶風馬僧虔河東衛隆景並著秦史及姚氏之
滅殘缺者多弘從弟和都仕魏為左民尚書又追
撰秦紀十卷夏天水趙思羣北地張淵於真興承
光世並受命著其國書及統萬之亡多見焚燒西

涼與西秦北燕其史或當代所書或他邦所錄段
龜龍記呂氏宗欽記禿髮氏韓顯宗記呂馮氏唯
此三者可知自餘不詳誰作魏世黃門侍郎崔鴻
乃考覈衆家辨其同異除煩補闕錯綜綱紀易其
國書曰錄正紀曰傳都謂之十六國春秋鴻始以
景明之初求諸國逸史逮至始元年鳩集稽備而
猶闕蜀事不果成書推求十有五年始于江東購
獲乃增其篇目勒為十卷鴻歿後永安中其子繕
寫奏上請藏諸秘閣由是偽史宣布大行于時

晉書載記前趙劉淵字元海冒頓之後以懷帝永嘉四年僭位至曜三世凡二十七年以成帝

咸和四年滅

後趙石勒字世龍武鄉羯人勒以成帝咸和三年僭立二主四子凡二十三年以穆帝永嘉五年滅

前燕慕容廆鮮卑人始廆以武帝六年稱公至暉四世凡八十五年以海西公太和五年滅

後燕慕容垂以太原八年僭位改元建興傳至熙祖

南燕慕容德以安帝隆安四年僭位至趙二世滅

蜀李特巴西宕渠人子雄僭號國號成至李壽嗣位改曰漢始特以惠帝太安元年起兵至勢六世凡四十六年以穆帝永嘉三年為桓溫所滅

前凉張駿字公庭寔之子也建興四年封霸城侯自執為凉州至天錫凡九世七十六年為苻

堅所戚

前秦苻健字建業洪第三子也健以穆帝七年
僭自立苻登五世四十四年以孝武太元十九
年滅

苻堅字永固雄之子也初堅母少寡將軍李威
有辟陽之寵史官載之至是聖收起居注觀之
見其事情怒乃焚其書檢史官將加其罪會趙
泉車駿等已死乃止堅後為姚萇所執縶于新
平佛寺

後秦姚萇字景茂以孝武太元九年僭立至泓
三世凡三十二年以安帝義熙十三年為劉裕
所滅

夏赫連勃勃字屈孑匈奴右賢王去卑之後僭
位改元真興子昌改元承光始勃勃以安帝義
熙二年僭位至昌二世凡二十六年為魏所滅
西涼李暠字玄盛隴西成紀人暠以安帝隆安
四年立至宋少帝景平元年滅凡二十四年
西秦乞伏國仁隴西鮮卑人國仁以孝武太元

十年僭位至慕末四世凡四十六年為赫連定所滅

後涼呂光畧陽氏人以孝武太元十二年定涼州十五年僭位傳至隆以安帝元興三年滅凡十有三年

北燕馮跋字文起信都人跋以孝武太元二十

年僭位至弘二世凡二十八年滅

魏書景明至始魏主恪改元永安魏莊帝改元

補注

十六國春秋徐光字季父頻邱人父聰以牛醫為業光有文才石勒署為參軍尋遷中書令領秘書監光嘗勸勒除虎威權以安太子勒不聽及死虎惡朝政以私憾殺之

十六國春秋傅暢字世道北地泥陽人父祗晉右僕射暢年未弱冠甚有重名永嘉之亂沒于石勒以為大將軍右司馬作晉諸公叙讚二十卷又為公卿故事九卷行于世以勸建平元年卒

宋書吉翰傳翰字休文馮湖池陽人為將佐十餘年清謹剛正甚為高祖所知假節監徐兗二

州豫州之梁郡諸軍事徐州刺史

十六國春秋趙整字文業一名正署陽清水平人
或云清陰人年十八為符堅著作郎無賴而瘦
有妻妾而無兒時人謂為閹然情度敏達學兼
內外性好幾諫無所迴避官至秘書侍郎後因
關中佛法之盛願欲出家堅惜而未許堅死方
遂其志更名道整遁跡商洛山後終于襄陽
十六國春秋姚和都仕典為太子右衛將軍左
兵尚書及泓嗣立轉給事黃門侍郎撰秦記十
卷記姚萇時事

十六國春秋張淵不知何處人明占候自云嘗
事苻堅堅敗事姚興父子為靈臺令泓賦入仕
赫連勃勃復為太史令世祖平統萬淵與徐辨
俱見獲

十六國春秋趙漢字思羣天水人仕姚興歷中
書侍郎為勃勃所虜拜著作郎世祖平統萬見

逸所為文、舉勅、勅太過、怒欲推之、崔浩違曰、文士褒貶、多過其實、皇王之道、固宜容之、世祖乃止、

十六國春秋、宗欽、字景若、金城人、父變、字文友、呂光太常卿、欽博綜羣言、聲著河右、仕蒙遜為世子洗馬、上東宮侍臣、咸甚見親重、欽在河西時、撰涼記十卷、記蒙遜事、無足可稱、

十六國春秋、索綽、字士父、燉煌人、父戢、晉司徒綏家貧、好學、幼舉孝廉、為記室祭酒、母喪去官、又舉秀才、為儒林祭酒、駿命為西曹掾、關內外事付綽、著涼春秋五十卷、以著述功、封平東侯、十六國春秋、劉昞、字彥明、燉煌人、李嵩徵為儒林祭酒、昞以三史文繁、著畧記百三十篇、八十四卷、涼書十卷、燉煌寶錄二十卷、後蒙遜平酒泉、拜秘書郎中、賜號元虞先生、

隋書經籍志、趙書十卷、記石勒事、偽燕太傅長史田融撰、二石傳二卷、二石偽治時事二卷、俱晉北中郎叅軍王度撰、漢書十卷、華陽國志十

二卷俱常璩撰、燕書二十卷、記慕容偽事、偽燕尚書范亨撰、南燕錄六卷、記慕容德事、偽燕中書侍郎王景暉撰、秦紀十卷、宋殿中將軍裴景仁撰、秦紀十卷、記姚萇事、魏尚書姚和都撰、涼記十卷、記張軌事、偽涼著作佐郎段龜龍撰、漢趙記十卷、和苞撰、北史崔光傳、光弟子鴻、字彥鸞、官散騎常侍、見晉魏前史、皆成一家、無所指意、以劉元海、石勒、慕容儁、符健、慕容垂、姚萇、慕容德、赫連屈子、張軌、李雄、呂光、乞伏國仁、秃髮烏孤、李暹、沮渠家遜、馮跋等、並因世故、跨據一方、各有圖書、未有統一、乃撰十六國春秋、勒成百卷、因其舊記、時有增損褒貶焉、

後魏書

元魏史、道武時始令鄧淵著國記、為十卷、而條例

未成暨乎明元廢而不述神麌二年又詔集諸文士崔浩浩弟覽高閭鄧穎晁維范亨黃輔等撰國書為十卷又特命浩摠監史任務從實錄復以中書郎高允散騎侍郎張偉並叅著作續成前史書叙述國事無隱惡而刊石寫之以示行路浩坐此夷三族同作死者百二十八人自是遂廢史官至文成帝和平元年始復其職而以高允典著作修國記允年已九十手目俱衰時有校書郎中劉模長于緝綴乃令執筆而口占授之如是者五六歲

所成篇卷模有力焉。初國記自鄧崔以下皆相承作編年體。至孝文太和十一年詔秘書丞李彪著作卽崔光始分爲紀傳異科。宣武時命邢巒追撰孝文起居注。旣而崔光遵業補續下訖孝明之世。溫子昇復修孝武紀。濟陰王暉業撰辨宗室錄。魏史官私所撰盡於斯矣。齊天寶二年勅秘書監魏收博採舊聞勒成一史。又令刁柔、辛元植、房延祐、睦仲讓、裴昂之高、孝幹等助其編次。收所取史官懼相凌忽故刁辛諸子並乏史才唯以髣髴學流

憑附得進。於是大徵百家譜狀。斟酌以成魏書。上自道武。下終孝靜。紀傳與志。凡百三十卷。收諂齊氏於魏室。多不平。既黨北朝。又厚誣江左。性憎勝己。喜念舊惡。甲門戚德。與之有怨者。莫不被以醜言。沒其善事。遷怒所至。毀及高曾。書成。始奏詔收于尚書省。與諸家論討。前後列訴者。百有餘人。時尚書令楊遵彥。一代貴臣。勢傾朝野。收撰其家傳。甚美。是以深被黨援。諸訟史者。皆獲重罰。或斃于獄中。羣怨謗聲不息。孝昭世。勅收更加研審。然後

宣布于外書成嘗訪諸羣臣猶云不寔又令治改其所變易甚多由是世薄其書號為穢史至隋開皇勅著作郎魏澹與顏之推辛德源更撰魏書矯正收失澹以西魏為真東魏為偽故文恭列紀孝靜稱傳合紀傳論例摠九十二篇煬帝以澹書猶未能善又勅左僕射楊素別撰學士潘徽褚亮歐陽詢等佐之會素薨而止今世稱魏史者猶以收本為主焉

魏書太祖道武帝諱珪獻明帝之子太宗明元皇帝諱嗣道武之長子也世祖太武皇帝諱素

明元之長子也。改元神廟。高宗文成皇帝。諱濬。
景穆皇帝之長子也。改元和平。高祖孝文皇帝。
諱宏。獻文帝之長子也。改元太和。世宗宣武皇
帝。諱恪。孝文帝之第二子也。肅宗孝明皇帝。諱
詡。宣武帝之第二子也。孝靜皇帝。諱善見。清河
王。竇之世子也。出帝平陽王。修。為斛斯椿等逆。
角。出于長安。是為西魏。孝靜帝遷都鄴。是為東
魏。

北史。崔浩弟簡。字仲亮。一名覽。道武初。歷中書
侍郎。叅著作事。

北史。高閼。字閼士。漁陽雍奴人。和平末。仕中書
侍郎。與高允齊名。時稱二高。

魏書。高允。字伯恭。渤海蓼人。領著作郎。

魏書。李彪。字道國。頓邱人。魏孝文初。為秘書丞。

北史。崔光。清河人。本名孝伯。字長仁。孝文賜名
焉。仕著作郎。

北史。邢密。字洪賓。河間鄆人。累遷中書侍郎。
北史。溫子昇。字鵬舉。其先太原人。祖避難家濟

珍。孝莊時為主客郎中。

北史刁柔字子溫。鮮中司空行參軍。累遷國子博士。

北史辛元植。德源之從祖兄也。齊天保中。歷位北海太守。

北史楊愔字道彥。華陰人。仕至尚書右僕射。

北史閻皇。隋文帝改元。

北齊書顏之推字介。琅邪人。為梁湘東王常侍。

自齊入周。至隋閻皇名為文學。

北史辛德源字孝基。隰西人。入隋。牛弘以德源

才學。奏與王勃同修國史。

北史滿徽字伯多。吳郡人。入隋。晉王廣引為楊

州博士。帝尉氏。令與褚亮等撰魏書。

唐書褚亮字希明。錢唐人。太宗起文學館。亮為

學士。

唐書歐陽詢字信本。潭州人。仕隋為太常博士。

入唐。貞觀中為太子率更令。

補注

魏書鄧淵傳淵字彥海安定人魏尚書吏部郎
撰周紀十餘卷次年月起居行事而已未有
體例

北史儒林傳張偉字仲業太原中都人學通諸
經鄉里受業者常數百人太武時與高允俱被
辟命累遷中書侍郎進爵建安公
魏書濟陰王暉宗少陰簡長乃變節決于史入
齊降封美陽縣公撰魏書王世家號為辨宗室
錄四十卷
北史楊敷傳敷子素字處通封趙國公

北齊書

高齊史天統初太常少卿祖孝徵述獻武起居名
曰黃初傳天統時中書侍郎陸元規常從文宣征
討著皇帝實錄惟記行師不載它事自武平後史

官陽休之杜臺卿祖崇儒崔子發等相繼注記逮
於齊滅隋秘書監王劭內令史李德林並少仕鄴
中多識故事王乃憑述起居注廣以異聞造編年
書號曰齊志十有六卷其序云二十卷今世間傳者唯十六卷焉李在
齊預修國史創紀傳書二十七卷至開皇初奉詔
續撰增多齊史三十八篇已上送官藏之秘府皇
家貞觀初勅其子中書舍人百藥仍其舊錄雜採
它書演為五十卷今之言齊史者唯王李二家云
北齊高祖高歡以武定五年薨謚獻武王天統
元年改謚神武皇帝子洋受魏禪國號齊是為

顯祖文宣皇帝後主緯武成帝之長子。改元天統。又改武平。

北齊書祖珽字孝徵瑩之子也。起家秘書郎。後主時。倭于陸。登拜尚書左僕射。

北齊書陽休之字子烈。無終人。仕魏黃門侍郎。入齊遷尚書。

唐書貞觀太宗以元。

唐書李百藥字重規。德林之子也。仕隋為通事舍人。入唐拜中書舍人。

後周書

宇文周史大統年有秘書丞柳虬兼領著作直辭正色事有可稱。至隋開皇中秘書監牛弘追撰周紀十有八篇。畧叙紀綱。仍皆牴牾皇家貞觀初勅

秘書丞令狐德棻秘書郎岑文本共加脩緝定為

周書五十卷

北史周節孝閔皇帝宇文覺受西魏禪國號周
北史西魏孝武帝崩南陽王寶炬立是為文帝
改元大統
唐書岑文本字景仁南陽人貞觀初擢中書舍

人

補注

北史柳糾傳糾字仲盤河東解人仕周為秘書
丞領著作

隋書牛弘傳弘字里仁安定鶉觚人在周襲封
監涇公閔皇初授散騎常侍秘書監封奇章公

隋書

隋史當開皇仁壽時王劭為書八十卷以類相從

定其篇目。至於編年紀傳並闕其體。煬帝世。唯有王胄等所修大業起居注及江都之禍。仍多散逸。皇家貞觀初。勅中書侍郎顏師古給事中孔穎達共撰成隋書五十五卷。與新撰周史並行。于時初太宗以梁陳及齊周隋氏並未有書。乃命學士分修事具於上。仍使秘書監魏徵摠知其務。凡有讚論徵多預焉。始以貞觀三年創造。至十八年方就。

杜姚思廉貞觀二年起功多於諸史一歲

合為五代紀傳并目錄凡二

百五十二卷書成下於史閣。唯有十志斷為三十

卷尋擬續奏未有其文。又詔左僕射于志寧、太史令李淳風著作郎韋安仁、符璽郎李延壽同撰其先撰史人。唯令狐德棻重預其事。太宗崩後刊勒始成。其篇第雖編入隋書。其實別行。俗呼為五代史志。

隋書開皇仁壽俱文帝改元大業煬帝改元

北史王褒字承玄瑯邪人隋大業初為著作郎

唐書顏師古字籀其先瑯邪人祖之推自齊入周遂居閩中師古貞觀中遷秘書監

唐書孔穎達字仲達衡水人太宗引為弘文館學士

唐書魏徵字玄成鉅鹿人初為隱太子洗馬後遷秘書監

唐書于志寧字仲謐高陵人武德中兼文學館學士

唐書李淳風岐州雍人與諸儒脩書遷太史令

補注

通考晁氏曰隋書八十五卷唐魏徵等撰紀五列傳五十五長孫無忌等撰志三十初詔顏師古孔穎達脩述後撰其事序論皆徵自作後詔于志寧李淳風韋安仁李延壽同修五代史志詔編第八隋書天文律歷五行三志獨淳風作

唐書

惟大唐之受命也義寧武德間工部尚書溫大雅首撰創業起居注三篇自是司空房玄齡給事中許敬宗著作佐郎敬播相與自立編年體號為實

錄迄乎三帝世有其書貞觀初姚思廉始撰紀傳
粗成三十卷至顯慶元年太尉長孫無忌與于志
寧令狐德棻著作郎劉肅之楊仁卿起居郎顧胤
等因其舊作綴以後事復為五十卷雖云繁雜時
有可觀龍朔中敬宗又以太子少卿摠統史任更
增前作混成百卷如高宗本紀及永徽名臣四夷
等傳多是其所造又起草十志未半而終敬宗所
作紀傳或曲希時旨或猥釋私憾凡有毀譽多非
實錄必方諸魏伯起亦猶張衡之蔡邕焉其後左

史李仁寶續撰于志寧許敬宗李義府等傳載言紀事見推直筆惜其短世

一作歲

功業未終至長壽

中春官侍郎牛鳳及又斷自武德終于弘道撰為唐書百有十卷鳳及以暗聾不才而輒議一代大典凡所纂錄皆素責私家行狀而世人叙事罕能自遠

一作速

或言皆比興全類咏諷或語多鄙樸實

同文案而摠入編次了無釐革其有出自胃臆申其機杼發言則嗤鄙怪誕叙事則參差倒錯故閱其篇第豈謂可觀披其章句不識所以既而悉收

姚許諸本欲使其書獨行由是皇家舊事殘缺殆
盡長安中余與正諫大夫朱敬則司封郎中徐堅
左拾遺吳兢奉詔更撰唐書勒成八十卷神龍元
年又與兢等重修則天實錄編為二十卷夫舊史
之壞其亂如繩錯綜艱難期月方畢雖言無可擇
事多遺恨庶將來削繁猶有憑焉大抵自古史臣
撰錄其梗槩如此蓋屬詞比事以月繫年為史氏
之根本作生人之耳目者畧盡於斯矣自餘偏記
小說則不暇具而論之

北史義寧隋恭帝改元

唐書武德唐高祖改元

唐書溫大雅字彥弘并州人隱太子將為亂奏

王表大雅鎮洛陽

唐書房玄齡字喬臨淄人仕中書令

唐書顯慶永徽龍朔弘道俱高宗改元

唐書長孫無忌字機輔洛陽人高宗即位拜太

尉

唐書李義府其先瀛州人後家于水太貞觀中

拜太子舍人

唐書長壽武則天改元

補注

通考晁氏曰唐創業起居住五卷黃門侍郎

大雅撰記高祖建義至受隋禪用師符讖受命

典冊專

唐書藝文志高祖寶錄二十卷破播撰房玄齡

監脩許敬宗刪改今上寶錄二十卷破播顯慶

撰房玄齡監脩貞觀寶錄四十卷長孫無忌撰

皇帝實錄三十卷。許敬宗撰。中宗實錄二十卷。房宗實錄五卷。吳兢撰。則天皇后實錄二十卷。魏元忠、徐堅等撰。劉知幾、吳兢刪改。唐書一百卷。又一百三十卷。吳兢述。柳芳等撰。通鑑七卷。李仁實撰。

唐書嘉貞傳。許敬宗字延族。杭州新城人。為李密記室。太宗召署文學館學士。除著作郎。兼修國史。初高祖太宗實錄。敬播所撰。信而詳。及敬宗身為國史。竄改不平。後拜太子少師。以特進致仕。

唐書儒學傳。敬播蒲州河東人。貞觀初。擢進士第。詔詣秘書省。參纂隋史。遷著作佐郎。兼修國史。永徽後。歷諫議大夫。給事中。初播與許敬宗撰高祖實錄。至是又撰太宗實錄。房元齡嘗稱播陳壽之流。

唐書姚思廉傳。思廉本名簡。以字行。陳吏部尚書察之子。察自吳興遷京兆。遂為萬年人。思廉仕唐為著作郎。弘文館學士。詔與魏徵共撰梁

陳書以卒父業。

唐書令狐德棻傳德棻宜州華陽人武德初為秘書丞後遷吏部侍郎兼修國史以金紫先祿大夫致仕時又有勳世隆顧胤李廷壽李仁實皆以史學稱當世。

顧胤蘇州吳人父覽隋秘書學士胤永徽中遷起居郎兼修國史以撰太宗實錄勞加朝散大夫弘文館學士論次國史加朝請大夫封餘杭縣男。

李仁實魏州頓邱人官至右史。

唐書朱敬則傳敬則字少連亳州永城人武后時為正諫大夫兼修國史韋安石嘗閱其藁史歎曰董狐何以加後為丹祖雍誣奏貶涪州刺史。

唐書吳兢傳兢汴州浚儀人方直寡諧惟與魏元忠朱敬則游二人薦兢才堪論議詔直史館修國史遷右拾遺時張說罷宰相在家脩史大臣奏國史不容在外詔兢等赴館撰錄久之坐

書事不當。貶荊州司馬。初與劉子元撰定武后實錄。叙張昌宗誘張說誣誣魏元忠事。後說為相。知說所為。從容諺謂曰。劉生書魏齊公事。不少假借。奈何。說曰。子元已亡。不可受誣。地下。說實為之。其草故在。聞者愛其直。說屢以情斬改。辭曰。狗公之情。何名實錄。卒不改。世謂今董狐云。

孫端綬佩章
景緯揆基
校

史通訓故補卷之十二終